

10. oktober 2016

**Danmarkip naalagaaffiata inatsisaata tunngaviusup § 42-ni ikinnerussuteqartunik illersuinissamut aalajangersakkamut aallaaviatigut naapertuuttumik Inatsisartuni inatsisissatut siunnersuummik akuerineqarsimasumik, pisut aalajangersimasut ataasiakkaat minillugit, Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit innuttaasunik taasititsissutigineqarsinnaanissaanik aalajangiisoqarsinnaanissaanik Naalakkersuisut UPA2017-mut inatsisissatut siunnersuusioqqullugit peqquneqarnissaanik Inatsisartunut aalajangiiffigisassatut siunnersuut.**

(Inatsisartunut ilaasortaq Peter Olsen, Inuit Ataqatigiit)

Siumumiit Inatsisartuni ilaasortaq Peter Olsen Inuit Ataqatigiinneersup aalajangiiffigisassatut siunnersuuteqarneranut qutsavigaarput.

Siumumi isumaqarpugut inuiattut tamat oqartussaaqataanerat eqqarsaatigalugu aqqissuusaanerput ajunngitsuusooq naapertuuttorlu. Tassalu maannamut innuttaasut qinersinermikkut sinniisaasa nalinginnaasumik amerlanerussuteqartut tunngavigalugit aalajangiisarnerat pissusissamisoortuusooq Siumumi isumaqarpugut.

Naalakkersuisut siunnersuummut akissuteqaateqarnerminni oqariartuutigisaat Siumumiit isumaqatigaarput, tassalu tamat oqartussaaqataanerat pineqartillugu nalinginnaasumik amerlanerussuteqar-  
tarnerup atuunna ingerlaannartariaqartoq.

Inatsisartunut, kommunalbestyrelsinut nunaqarfinnilu aqutsisunut qinersisarnerit, taamaalillunilu nunap aqunneqarnerani sinniisuutitassanik pilersitsiviusumik kinguneqartartup ammasumik tamanillu akuutitsinermik toqqammaveqartumik ingerlanneqarsimanerat ineriartortinneqarsimane-  
rallu Siumumiit naammagisimaaratsigit matumani aamma oqaatigissavarput. Naapertuuttutullu isumaqarfigaarput Inatsisartuni aalajangigassat sulluunniit Inatsisartuni innuttaasunit qinigaasuni politikikkut amerlanerussuteqarneq aallaavigalugu aalajangersaasarnelit ingerlaannarnissaat.

Innuttaasunik taasititsisoqartarsimavoq, taakkualu nunamut tamarmut kiisalu innuttaasunut kikkun-  
nulluunniit annertuumik attuumassuteqarnermik taakkua tunngaveqarput. Namminersorneruler-  
nissaq aammalu Namminersulernissaq ilaatigut matumani pineqarput, apeqqutillu taakkua annertuut  
inuiatigiit aqunneqarnermik nunanullu allanut attaveqarnerannut allangortitsisuupput  
taamatullu innuttaasut qanimut oqartussaaqataanerannut attuumassutilerujussuupput  
pingaaruteqartorujussuullutillu. Taamaattumik qularutissaagunangilaq siunissami innuttaasunik  
taasititsisoqarsinnaaneramik imalimmik qaqitsisoqaqqinnissaa, apeqqutimmi pingaarutillit  
sulluunniit Inatsisartutigoortumik qaqilerneqarsinnaapput siunnersuutigineqarlutillu.

Naggataatigut Siumumiit naleqquttuusutut isumaqarfigisarput erseqqissarusupparput, tassalu Inatsi-  
sartuni innuttaasunik taasititsisoqarnissaanik aalajangiisarnissat pillugit periarfissaqartuarnissap  
qulakkeersimaneqarnissaa, tamannalu maanna Inatsisartuni sulinermi periarfissaavoq. Inatsi-  
sartunimi ilaasortat kikkulluunniit politikikkut apeqqutit pillugit innuttaasunik taasititsinissamik  
siunnersuuteqarnissamut periarfissaqarput.

Siumumiit taamatut oqaaseqarluta qulaanilu tunngavilersuutigisavut innersuussutigalugit siunnersuutip matumap itigartitsissutigineqarnissaa inassutigaarput.

Anders Olsen  
Siumut.